

TE HEHEURAA API

I neia i te piha neneiraa na te Ekalesia a Iesu Mesia i te Feia
Mo'a i te Mau Mahana Hopea Nei i Papeete, Tahiti,
i te mau fenua Sotaiete. i te mau avae atoa.
Te hoo e piti farane i te matahiti hoê.

Nu. 1.

Tenuare 1929.

Mat. 23.

*E teie nei, e haapae i te haavare, ei parau mau ta te ta-
ata atoa ia parau atu i te tahi, e melo ana'e hoi tatou no ta-
tou iho. E ia riri outou ra, eiaha ia harahia; eiaha ia mai-
ri te mahana i to outou ririraa. * * * Ia hamani maitai
outou ia outou iho, ma te aau maru aroha noa, ma te faaore
hoi i te hara te tahi e te tahi, mai ta te Atua i faaore mai i
ta outou i te Mesia ra. (Ephesia 4:25, 26, 32)*

Ia Ora Na Outou i te Matahiti Api

E TE MAU HOA no "*Te Heheuraa Api*" e tae noa'tu i
te mau taata atoa i te pae ao moana nei, aita atu e
parau e au no tatou i teie nei taima maori râ, *Ia Ora tatou*
atoa i roto i te here mau o to tatou Fatu, e to tatou Faaora e
to tatou Mesia.

I roto i te matahiti i mairi aénei ua rau te huru o te
mau ati e te mau maitai ta tatou i farerei. Ua pohe te hoé
pae i te maí e ua ora mai te tahi pae. Te tahi pae râ, ua
pohe roa'tu ia ratou e te tahi pae ra te vai noa ra i rotò i te
maí

Ua riro taua mau ati rii ei faaaraararaa ia tatou atoa,

ua tupu iho â to tatou mataú i te Atua. E no reira te mau hoa atoa o te taió i teie parau, e taimé feruriraa teie no tatou atoa, hou aé tatou e haere i ta tatou mau ohipa i te *Matahiti Api*. A faaore tatou i te mau ohipa faufaa ore, e te manaó hape e te mau ohipa hamani-ino-raa, e haafatata atu tatou atoa i te Atua. A arue atu tatou i te Atua e a faateitei tatou i te i'oa o to'na ra Tamaiti o Iesu Mesia, e a rave tatou atoa i te ohipa e au i te Atua. E ora tatou na roto i te mau ohipa maitai e te parau tia, e aore roa'tu â e i'oa i raro aé i te raí e ora'i te taata maori râ te i'oa o Iesu Mesia.

A haamanó tatou i ta Petero faaoraraa i te hoé taata pirioi i te uputa o te hiero i parauhia ra o Nehenehe. Ua rave-mau-hia taua ohipa ra i roto i te i'oa o te Mesia. E i muri'ho, ua tapeahia oia i mua i te haavaraa na te Ati Iuda. Ua anihia e ua haavahia oia no te ohipa ta'na i rave, a taió tatou i to'na pahonora mai ta'na i faaite atu i taua mau taata ra, "I aéra Petero i te Varua Maitai, e ua parau maira ia ratou, E te mau tavana o te taata, e te feia paari o Iseraela nei, oia hoi teie, te haavahia nei mauá i teie nei mahana i te maitai i tuuhia'tu i te taata paruparu, i te mea i ora'i oia nei; ia ite mai outou atoa, e te taata atoa o Iseraela nei e, no te i'oa o Iesu Mesia o Nazareta, ta outou i faatatauro iho nei, o tei faatihia e to Atua mai te pohe maira, no'na i tia'tu ai teie nei taata i mua i to outou aro ma te mai ore. O te ofai teie i faaruehia e outou, e te feia patu fare, e ua riro iho nei ei ofai tiavâ. Aore roa hoi e ora ia vetahi ê, aita'tu hoi e i'oa i faaitchia mai i te taata i raro aé i teie nei raí, e ora'i tatou nei. (Ohipa 4:8-12) Aita roa Petero i huna e aita hoi oia i feaa, ua fa'i papu râ oia i te i'oa o te Mesia. Ua riro mau te reira ohipa ei faaiteraa papu maitai ia tatou no te maitai, e te mana e te ora te vai ra i roto i te i'oa o te Mesia.

E te mau hoa here e, i roto i teie nei *Matahiti Api*, a haamanaó tatou atoa i to tatou Faaora, a faabaehaa tatou i to tatou mau aau e tiaoro pinepine atu tatou i te Atua i roto i te i'oa o Iesu Mesia, e auraro tatou i ta te Atua mau ture atoa. A faatupu tatou i te hau e te aroha i nia i te fenua nei e tae noa'tu i te haapao-maitai-raa i te mau ture no te tatou Hau metua, e na reira ibo â tatou i te faatupu i te maitai, e te oaoa e te ora i roto i teie *Matahiti Api*.

• Ia ora outou na roto i te i'oa o *Iesu Mesia* i teie nei *Matahiti Api*.

—*Te Heheuraa Api*

Te Vai nei te mau Taata ia Noaa to Ratou Oaoa

¶ **TE IMI NEI** te mau taata'toa i te oaoa, e te haere nei ratou i te mau eá ê i te titauraa i taua oaoa ra o tei riro ei tufaa faufaa rahi i to ratou oraraa i nia i te ao nei. Ua au anei te oaoa i te Atua? Te na ô maira te parau a te peropheta, "E riro oe i te faaite mai ia'u i te eá ora; te îraa o te oaoa i mua i to aro na; te maitai e vai i to rima atau e a muri noa'tu." (Salamo 16:11) Te faaite maira o Davida i roto i taua parau ra, te vai ra te îraa o te oaoa i mua i to te Atua aro e i to te Atua rima atau te vai ra te mau maitai e a muri noa'tu. E inaha, te parau atoa maira o Nephi, te hoé peropheta oia no te ati Nephi, na ô maira, "Ua hiá Adamu ia vai te mau taata, e te vai nei te mau taata ia noaa to ratou oaoa." (II Nephi 2:25) Te faaite maira o Nephi e, te vai nei te mau taata ia noaa to ratou oaoa. Na roto i teie nei parau ua nehenehe ia tatou ia manaó e, e te oaoa o te taata nei o te hoé ia tufaa rahi i roto i to te Atua Metua opuaraa no to'na mau tamarii.

E teie nei na roto i na parau poto e piti a na peropheta tahito ra, ua ite tatou nei e, o te oaoa ia te hoé mea i au i te Atua. Area râ, ia maiti maitai tatou i taua oaoa ra e tia'i. Te haere nei te mau taata i to ratou iho mau eá e ua noaa noa ia ratou te oaoa. Te vai nei râ na huru oaoa e piti, oia hoi, te oaoa o te ao nei e te oaoa o tei faa'i i to te taata hinaaro i te mau mea atoa. Te oaoa matamua o te oaoa ia no te mahana hoé, te oaoa piti râ o te oaoa ia o te vai e a muri noa'tu e tei farii-maitai-hia e te Atua.

Ua na ô atura Paulo i to Galatia, "E haapao ta te varua ra, e eiaha e faatupu i to te tino hinaaro." (Galatia 5:16) e ua parau faahou mai oia i to Roma, "Te oaoa nei râ tatou i te Atua, i to tatou Fatu ia Iesu Mesia." (Roma 5:11)

E tae mai te oaoa mau na roto i to tatou haapaōraa i ta te Fatu, eiaha na roto i te mau arearea o te faaino i to tatou mau tino, oia hoi, te fare o to tatou mau varua. E tia mai te oaoa na roto i te ohipa rahi, e te mau ati, e te mamae. E tia mai te oaoa na roto i te mau arearea mâ. E te oaoa o tei na reira i te tia mai, o te oaoa ia ta Davida ratou o Nephi e o Paulo i faaite maira, e ua farii-hia ia e te Atua.

A haere ai tatou i te tahi mau eá ê i te imiraa i te oaoa aita roa'tu te reira i itehia, maori râ te oaoa o te mairi mai te mahana hoé te huru.

A imi tatou i te oaoa mure ore, a tamata tatou i te maitai o te Atua na roto i te haapaōraa Ia'na. E i reira e hau tatou, no te mea e maha ai te hinaaro maitai i roto ia tatou nei.

—*Papaihia e Toma*

Aita to te roo maitai e tiaraa maori râ na roto i te ohipa maitai o tei faaoaoa i te tahi ê.

Te Faaroo no te Feia Mo'a Mau.

Ua iritihia teie nei parau na roto mai i te buka: "Te Hiro'a Faaroo" tei papaihia e Tamate Aposetolo; Faaauhia ei reo Tahiti e Elita.

*HIRO'A FAAROO 8. Te faaroo nei matou e, o te Bibilia ra o te parau mau ia a te Atua, ia tia te iritiraahia mai; * * * *.*

(E tuatiraa teie nei parau.)

UIRAA 5. E mea nahea te tupuraa o te Faufaa Apî?

P. Na te mau aposetolo a Iesu te reira i papai i tera taime e i tera taime a ora'i ratou. Mai te maha o te hanere matahiti na muri i te Mesia mai â, aita te reira faufaa i patoîhia mai te manaó e, ua hape te mau buka mai tei papai-hia ua, maori râ ua itea te tahi mau hape no te tuuraa reó i roto.

Parau Tauturu: I te taime i hamani-ino-hia'i te Feia Moá na muri iti aé i te Mesia ra, ua horoa te tahi no ratou i ta ratou mau buka moá ei paruru no ratou; e i te taime i arohahia'i te Feia Moá e te arii rahi ra, ua faautuahia ratou o tei horoa'tu i ta ratou mau buka moá ra e te Ekalesia, area râ na mua i to ratou faahaparaahia ia iteahia te mau buka moá e tia'i; no reira ua apoo maira te hoé mau taata e ua papairatou i te mau i'oa no te buka moá mai ta tatou i ite i roto i te Bibilia i teie nei mau mahana e ua riro te reira papairaa ei aratai no te faahaparaa'tu i te faahua Feia Moá.

Uiraa 6. Nahea te tatufaaraa o te Faufaa Apî?

P. Ua tatufaahia te reira na buka e 27 i roto i na tufaa e toru, oia hoi:

1- Te Parau Tuatapaparaa - - - - - 5

2- Te Mau Buka Haapiiraa. - - - - - 21

3- Te Buka Tohuraa. - - - - - 1

Parau Tauturu: 1- Tei roto i te Parau Tuatapaparaa na Evanelia e maha ra, e te Ohipa atoa hoi. Ua papai maira Mataio, Mareko, Luka, e o Ioane i na Evanelia, e na

Luka te Ohipa i papai.

2- Ua faataahia te mau buka haapiiraa e 21 ra i roto i na tufaa e piti, oia hoi: 1- Te mau Episetole a Paulo. 2- Te mau Episetole a Iakoba Petero, Ioane, e o Iuda.

3- Tei roto i te Buka Tohuraa te Apokalupo a Ioane.

Uiraa 7. Nahea te taeraa mai o te Bibilia i roto i to tatou reó nei?

P. Ua papaihia te Bibilia tumu i roto i te reó Hebera, na muri iti aé ua iritihia te reira i roto i te reó Latini e i oti to'na faaapîraahia ua fariihia te reira e te Ekalesia no Roma ei iritiraa tia. I muri aé i te reira taime ua iriti te taata ra o Wycliffe i te reira i roto i te reó Baratane no roto mai i te reó Latini. Ua na reira atura te tahi mau taata paari i te iritiraa no vetahi mau iritiraa ra e tae noa'tu i te tau no te Arii ra o Iakoba no Baratane i reira ua faauehia maira ia iriti mai e 47 pipi haapiihia i te hoé Bibilia no roto mai i te reó Helene e te reó Hebera, e ua na reira atura ratou; e te reira iho â ia te Bibilia i faaturahia i roto i te reó Baratane. I muri mai, ua iritihia taua buka Baratane ra i roto i te reó Tahiti e te mau orometua no te Taiete Bibilia i Baratane, e no reira maira to tatou Bibilia i teie nei.

Uiraa 8. O vai te tahi buka o tei riro ei tauturu no te faatiaraa i te Bibilia?

P. O te Buka a Moromona ia taua buka ra.

Parau Tauturu: Mai te au i te Buka a Moromona ua faarue Lehi mai i te fenua ra i Ierusalema e 600 matahiti na mua i te Mesia, e ua afai atura ratou i te hoé mau apî veó i to ratou haereraa, ua ootihia te parau i nia iho i te reira mau apî mai te au i tei roto i te Bibilia. Ua na ô maira Nephi e, "E oti a'era ia raua te haamaitai i te Atua o Iseraela ra rave ihora to'u metua ra o Lehi i te papaa parau i ootihia i nia i te mau api veo ra, e ua imi ihora oia mai te haamataraa mai e tae noa'tu i te hopea. E ite a'era oia e, tei roto ra

na buka e pae a Mose ra, tei faaite mai i te haamataraa o teie nei ao, e te parau no to tatou na metua matamua ra o Adamu raua o Eva. E papaa parau atoa hoi no te ati Iuda ra mai te matamua mai â, e tae roa mai i te hau o te arii o Iuda ra o Zedekia; E te mau tohu hoi a te mau peropheta mo'a ra, mai te matamua mai â e tae roa mai i te hamataraa o te hau o Zedekia ra, e te mau tohu hoi i parauhia e te vaha o Ieremia ra." (I Nephi 5:10-13)

Ua ite Nephi i te hoé orama no te haereraa'tu i te hoé buka no roto mai i te Ati Iuda i te revaraa'tu i rotupu i te mau Etene. I Nephi 8:21-23. E te vai ra te tahi mau parau mai tei iritihia maira no roto i te mau apiveo e ua fata-ta to te reira huru i to te tahi parau i roto i te Bibilia. Ua faaite-atoa-hia te huru no to Iesu oraraa i rotupu i te Ati Iuda e te Ati Nephi atoa hoi i roto i taua buka nei, e no reira ua riro te Buka a Moromona-eifaatiaraa i te mau parau i roto i te Bibilia.

** * E te faaroo atoa nei hoi matou e, e te Buka a Moromona ra, o te parau mau ia a te Atua.*

Uiraa 1. Eaha te Buka a Moromona?

P. O te hoé parau faaûrûhia te reira o tei papaihia e te mau peropheta tei noho i te fenua Amerika i te tau na mua roa ae i te Mesia e tae noa'tu i te maha banere o te matahiti na muri mai Ia'na ra; e ua iritihia taua parau tuatapaparaa ra i roto i teie nei ui na roto i te maua e te horoa o te Atua mai te haapaoraa i To'na faaueraa.

"E parau haapoto ia te papaa parau a te ati Nephi, e te ati Lamana hoi; i papaihia i te ati Lamana ra, e tahi pae ia ratou o te toea o te utuafare o Iseraela ra, e i te ati Iuda, e i te Etene atoa hoi; i papaihia na roto i te faaue, e te varua tohu, e te heheuraa parau. I papaihia e i tapirihia, e i hunahia hoi i te Atua ia ore ia mou; ia heheuhia râ na roto i te horoa e te mapa o te Atua, e ia faaite-papu-hia mai te

aunaa; i tapirihia e te rima o Moroni, e i hunahia hoi i te Atua ra, ia heheubia i te tau mau, e ia na te Etene ia; e ia faataahia hoi e te horoa a te Atua ra.

“E parau haapoto atoa hoi i te Buka a Etera ra, oia hoi te papaa parau no te ati Iareda ra; o tei haapurarahia i te tau i faahuruê ai te Atua i te reó o te mau taata a hamani ai ratou i te pare e tae atu ai i te raí ra; ei faaite i te toea o te utuafare o Iseraela i te mau mea taa ê ta te Fatu i rave i to ratou mau metua ra; ia ite ratou i te mau parau faufaa a te Fatu ra, e ore ratou e faaruehia e a muri noa’tu; e ia faaite papu atu hoi i te ati Iuda e te Etene atoa hoi e, o IESU, o te MESIA ia, te ATUA MURE ORE, o te faaite ia’na iho i te mau fenua atoa ra. E teie nei, mai te mea e hapa to roto nei, o te hapa ia a te taata; e tena na, eiaha e faahapa i te mau mea a te Atua, ia tia outou i mua i te haavaraa a te Mesia ra ma te porao ore.”

(Te mau parau i nia i te api matamua no te Buka a Moromona)

Parau Tauturu: O Iosepha Semita ia te taata i maiti-mau-hia e i faaûrûhia no te iritiraa i taua buka ra i roto i te reó Baratane. I te 21 no Setepa 1823, ua farii Iosepha i te hoé orama no Moroni, oia te peropheta hopea o tei papai i te Buka a Moromona e tei hunā i te reira i roto i te repo.

I taua taima ra na faaite maira taua melahi ra ia Iosepha e, te vai ra te hoé mau api auro i hunahia i roto i te aivi ra o Cumora i te mataeinaa ra o Wena, tei fatata i te oire ra o Pamera i te tufaa fenua ra o Niu Ioka. Ua haere atura Iosepha i reira i taua mahana ihora e ua itea taua mau api ra e ana. Aita râ oia i faatiahia ia iriti mai i taua mau mea ra e tae noa’tu i te maha o te matahiti i muri aé i te reira taima. I te 22 no Setepa i te matahiti 1827 ua farii Iosepha i te mau api auro ra e te urima e te tumima ei tauturu no’na i te iritiraa i taua mau parau ra.

Mai reira mai â e tae noa'tu i te neneiraa o te Buka a Moromona ua imi noa te mau enemi i te ravea e roaa'i taua mau api ra. Ua paruruhia râ te reira e te Atua e i te matahiti 1830 ua faaotihia te neneiraa, e ua tae maira taua buka ra i rotopu i to te ao nei.

Aita te rahiraa o te mau taata i farii mai i te parau no te Buka a Moromona, no te mea aita ratou i faaroo i te fâraa mai o te Melahi i teie nei mau mahana hopea. Ua tuu mai râ ratou i te hoé pariraa i nia i te Buka a Moromona mai te parauraa'tu e, no roto mai te reira i te hoé parau i parauhia ra i te *Aamu Papai* i papaihia e Solomona Spaulding. Ua moé te reira parau papai e aita e ravea ia faaite papu i to te ao nei e, e mea haavare te reira parau. I te matahiti 1884 râ ua itea-faahou-hia taua parau ra i te fenua Vaihi e ua hiôpoahia'tura te reira mai te hinaaro ia haapapu i te mau parau haavare i tuuhia i nia iho i te Buka a Moromona; ua papu atura te manaó e, e ere te reira te tupuraa no te Buka a Moromona. I muri mai ua horoahia te *Aamu Papai* i te hoé fare vairaa ohipa tahito no te fare haapiiraa teitei, e ua papai mai te Peresideni no taua haapiiraa ra i te hoé rata i te hoé taâta tei ani atu ia'na no te haapapuraa i te mau parau no taua aamu papai ra. Tei raro mai nei te rata mai tei neneihia i roto i te Fetia Meleniuma i te fenua Baratane i te matahiti 1898:

Oberlin College, Ohio
Atopa 17, 1895.

Na J. R. Hindey,

Tau hoa e: Tei roto i to matou vairaa buka te hoé parau papai no Solomona Spaulding, e parau papu hoi te reira.

Ua ite au i te reira i te matahiti 1884 i roto i te rima no L. L. Rice i Honolulu, Vaihi. O oia te taata nenei vea no te tufaa fenua ra i Ohio i mutaa iho nei; e na mua aé i te reira ua nenei noa oia i te hoé vea i Painesville, e ua hoo mai

oia i tana fare neneiraa ra no te hoé taata o tei farerei ia Solomana vahine e tei roaa ia'na te parau no te *Aamu Papai*. Te vai ra taua parau ra i rotapu i ta'na (L. L. Rice) mau parau papai e tae noa'tu i to'u auiraa'tu ia'na no te tahi parau no te faatitiraahia o te taata ereere.

Tei nia iho i taua parau ra na-i'oa no na taata i Conneaut, Ohio o tei faaroo ia Spaulding i te taióraa i taua parau ra, e ua ite hoi ratou e, na'na iho taua parau ra. Aita e nehe-nehe i te taata ia ite i te reira parau maori rá ua papu ia'ua e, te reira te parau na Solomana Spaulding. E piti taime to'na neneiraahia, na te Moromona i Roto Miti Utaha i nenei te hoé hohoá, e na te Sanito i Ioua i nenei i te tahi hohoá. Ua farii te Moromona i to ratou hohoá na Mr. Rice i Honolulu, e ua horoa'tu vau i te tahi hohoá i te Sanito na muri mai i to'na taeraa mai i to'u rima.

Aita roa'tu teie parau papai te parau tumu no te Buka Moromona.

To oe hoa,
Jas. H. Fairchild

Te taata o tei hau i te rahi e te maitai o oia ia o tei maiti i te parau tia mai te manaó tauí ore, o tei haaví i te mau faahemaraa puai no roto e no rapaeau, o tei afai i te hopoia teiaba roa mai te oaoa, o tei hau i te maru a tupu mai ai te mau ati e tei mataú ore i to te taata hióraa ino, e to'ua tia-turi i te parau mau, e i te mâ e i te Atua hoi, e mea feaa ore ia. Te faaroo nei au e, e teie huru rahi e teie huru maitai tei roto ia i te pupu taata haehaa, e aita e â to ratou mau i'oa i faaroohia.

Te faaite atu nei "*Te Heheuraa Api*" i te poheraa o "Timi â Mapuhi". Ua pohe atura oia i te 28 no Novema i te matihiti 1928.

Te Mau Parau Apî

Ua mau e atura te pahi reva opupu; o "Graf Zeppelin" no te fenua Purutia e tae noa'tu i te fenua Amerika, mai te afai atura e maha ahuru matarō e e piti ahuru horo patete. Te roa o to'na maueraa e 5,600 maile ia e ua maie taua pahi reva opupu ra i te reira area i na hora 110. Ua hau taua pahi reva opupu ra i te rahi i te mau pahi reva atoa i nia i te ao nei.

Ua ore rii te peapea o te mau taata faatere i te pahi reva i teie nei tau. Eita ratou e peapea rahi a ino ai to ratou mau machine i na maile i nia i roto i te reva, no te mea ua itehia te ravea ia ore ratou e pohe a mairi ai te pahi reva ta ratou e faatere. Ua hamanihia te hoé mea o tei parauhia i te i'oa, Parachute. E taua mea nei, ia tuuhia i roto i te matai e riro ia mai te fare amerara te huru. Ua tamauhia te reira mea i nia i te mau pahi revae a ino ai te machine e huti te taata faatere i te hoé tanra e na te Parachute e haamairi te pahi reva i te fenua mai te maru. Ua tamatahia te hoé mau Parachute rahi e ua nehenehe ia ratou ia haamairi mai te maru i na kilo 2,400.

Ua taparahihia e 200,000 Tinito e te feia i parauhia Mahomeda, i roto i te tufaa Kansu i o te fenua Tinito. Ua tupu te reira taparahiraa rahi no to te Tinito faaroo ore i te haapaoraa o te Mahomeda, oia hoi, te haapaoraa Mahomeda. I roto i te orure hau i tupu i reira ua haamou-roa-hia te hoé mau oire, e te mau taata o taua mau oire ra o tei ore i pohe, ua vai'hohia ia maite maa ore. Taua parau faaiteraa ra o te parau ia i fariihia e te taata faatere o te hoé Societe tauturu i tei atihia i te fenua Tinito, to ratou tumu, tei i o te oire Niu York i Amerika.

I roto i to te mau taata imiraa i te mau peu o te hoé mau manumanu ua ite ratou i te hoé mau mea maere i roto i te manumanu i parauhia i te i'oa Tutuarahonui. Ua ite ratou i te mau ohipa e rave rahi ta teie manumanu i rave i te taura ta'na i haune, ua parauhia taua taura nei i te i'oa Puaverevere. Ua faaauhia te puai o te taura o te Tutuarahonui e te taura ta te taata nei i hamani e ia hoé â faito na taura e piti ua hau roa'tu te taurao te Tutuarahonui i te puai i te taura ta te taata i hamani. No te puai o te puaverevere ua nehenehe i te Tutuarahonui ia haavî i te manumanu o tei hau i te puai ia ratou iho. Ua ite-atoa-hia te Tutuarahonui e na hanere maile i tua e te hoé mau taata i nia i te hoé mau pahi. Na te reira e faaite mai e, ua nehenehe i te mau Tutuarahonui ia hamani i to ratou iho mau pahi reva no roto mai i te puaverevere, e ite rahi hoi to ratou. Ia haunehia te mau taura i au no to ratou maueraa e buti ratou i te hoe taura e na te mataí e faateitei ia ratou i nia i roto i te reva, e a hinaaro ai ratou ia pou i raro e tuuhia te tahi taura e e mairi ratou i nia i te fenua i te au i to ratou hinaaro. I nia i te motu o tei parauhia i te i'oa, New Guiana, ua ravehia te puaverevere no te hoé Tutuarahonui rahi i reira ei upea iá, oia hoi, e rave te mau taata no te reira fenua i te hoé raau mai te haamenemene i te reira ia riro mai te huiria te huru, ei reira e tuu ratou i taua raau ra i roto i te uru-raau e na te Tutuarahonui rahi o tei noho i reira e haune i to ratou puaverevere i nia i te reira, a hoí mai ai te taata i na mahana imuri'ho ua oti ta'na upea iá i te hamanihia e te Tutuarahonui e eita e ino i te pape. No roto mai teie parau i te buka parauhia, "Science and Invention" no te avae Novema i te matahiti 1928, i te api 594-595.

Alma G. Burton Imprimeur,
Rue Brea et de la rue Dumont d'Urville, Orovini, Papeete